

31/08/1998

Semua perlu berkorban atasi kegawatan

KUALA LUMPUR, Ahad - Beberapa pemimpin politik dan masyarakat dalam perutusan sempena Hari Kebangsaan ke-41 esok, turut mengajak rakyat berusaha lebih gigih dan bersedia membuat pengorbanan lebih besar untuk memulihkan kegawatan ekonomi negara.

Presiden MCA, Datuk Seri Dr Ling Liong Sik, berkata rakyat tidak harus berputus asa dalam menghadapi cabaran paling sengit itu sejak negara mencapai kemerdekaan 41 tahun lalu dan harus yakin boleh memulihkan kemelesetan itu dalam jangka masa lebih pendek.

"Negara kita pernah mengalami kemelesetan ekonomi pada pertengahan 1980-an. Dengan kerjasama dan usaha gigih kerajaan dan rakyat, negara bukan saja dapat mengatasi kemelesetan ekonomi, bahkan muncul semula sebagai negara yang mempunyai kekuatan ekonomi," katanya dalam perutusan sempena Hari Kebangsaan ke-41 esok.

Dr Ling, yang juga Menteri Pengangkutan, meminta semua lapisan masyarakat terus memberi sokongan penuh kepada kerajaan dan kepimpinan Perdana Menteri Datuk Seri Dr Mahathir Mohamad dalam usaha memulihkan ekonomi.

Aktivis masyarakat, Datuk Lee Lam Thye, berkata Hari Kebangsaan perlu diraikan dengan semangat kesyukuran dan patriotik tanpa mengira bangsa dan agama.

Menurutnya, masyarakat seharusnya melihat hari itu sebagai hari kemegahan dan kebanggaan yang perlu dihayati semua peringkat.

Presiden Majlis Belia Malaysia (MBM), Saifuddin Abdullah, menyifatkan kemerdekaan negara ini tidak datang secara percuma, justeru ia adalah nikmat kerakyatan dan kenegaraan yang paling tinggi.

"Kemerdekaan negara hasil siri perjuangan dan pengorbanan yang panjang diikuti dengan usaha pembangunan bersepadu akhirnya menjadikan negara yang aman, bebas, maju, makmur serta sejahtera," katanya.

Beliau meminta rakyat terutama belia memberi sokongan padu kepada Perdana Menteri, Datuk Seri Dr Mahathir Mohamad.

(END)